

ԱՍՏՂԻԿ ԵՒ ԻՇԹԱՐ ԴԻՑՈՒՀԻՆԵՐԻ ԱՆՈՒԱՆ ԾԱԳՄԱՆ ԵՒ ԿԵՐՊԱՐԻ ՀԱՄԱԴՐՈՒՄՆԵՐ

Առասպելաբանութեան եւ ընդհանուր մշակութաբանութեան արդի նուաճումները թելադրում են նորովի մեկնաբանել հին եւ հնագոյն առասպելածիսական աւանդոյթում այս կամ այն աստուածութեան կերպարային յատկանիշները եւ խաղացած դերը: Հայկական դիցարանի սիրոյ եւ գեղեցկութեան դիցունու՝ Աստղիկի կերպարը գնահատելիս մենք եւս պէտք է նկատի ունենանք երկու գործօն: Դրանցից մէկը վերաբերում է հայկական դիցարանի միւս աստուածութիւնների հետ Աստղիկ դիցունու ունեցած կապին, նրանց փոխյարաբերութիւններին, իսկ երկրորդ գործօնը վերաբերում է այլ դիցարանների նմանաբնոյթ աստուածութիւնների հետ դիցունու ունեցած առնչութիւններին:

Աստղիկ դիցունին կերպարային որոշ ընդհանրութիւններ է դրսեւորում յունական Աֆրոդիտէի, հռոմէական Վեներայի, սեմական Իշթար, Աստարտէ եւ ուրիշ դիցունիների հետ: Այստեղ մենք կ'անդրադառնանք Աստղիկ եւ Իշթար դիցունիների անուան ծագման, կերպարային եւ այլ համադրումներին:

Աստղիկ անունը ածանցուած է աստղ հիմքից՝ նուազական -իկ մասնիկով: Ցեղակից լեզուներում աւանդուած է մի շարք զուգահեռներով, ինչպէս՝ խէթ. *hašter* «աստղ», վեդ. *stṛbhih*, աւ. *stərabyo*, յուն. *ἀστὴρ*, լատ. *stēlla*, միջ. իռլ. *ser*, գոթ. *stairnō*, հին բ.-գերմ. *sterno*, հին անգլ. *steorra*, հին իսլ. *sijama*: Աստղ բառն ունի հնդեւրոպական ծագում²: Սակայն հնդեւրոպական նախալեզուի բուն նախաձեւի ծա-

¹ Friedrich J., *Hethitisches wöten für'stern' und'star'*, 11, Heidelberg, 1969 C. Watkins, *Indo-european star* 1974.

² ԱՃԱՌԵԱՆ Հ., Հայերէն արմատական բառարան, հտ.1, Երեւան, 1971, էջ 278:

գումնային բնոյթը լիովին պարզ չէ, արդեօք այն բնի՞կ է, թէ փոխառուած է սեմական ինչ-որ հնագոյն աղբիւրից³:

Թ. Գամկրելիձէն եւ Վ. Իվանովը, յենդեկով յատկապէս խէթերէնում արձանագրուած *ḫašter* «աստղ» բառի վրայ, վերականգնում են հնդեւրոպական **Haster* նախաձեւը եւ հաւանական համարում հնդեւրոպական նախալեզուից սեմականին անցումը: Յստակ է, որ սեմական որոշ հին լեզուներում գործածուել են նմանաբնոյթ անուններ (աքադ. *lštar*, հին եբր. *ʾaštōret*, փիւնիկ, *štr*, հարաւ-արաբ. *štr*), որոնցից վերականգնւում է ընդհանուր սեմական **aštar* ձեւը՝ «աստղային աստուածութիւն», «այգաբացի աստուածացուած աստղ» նշանակութիւններով⁴:

Միջագետքեան իշթար անուան ծագման մասին գիտնականները տարակարծիք են: Ըստ Լազրանգի, Դահուդի, Մոսկատիի, Հոֆների եւ այլոց, այն սեմական ծագում ունի, թէեւ անուան ստուգաբանութեանը նրանք չեն դիմում: Ռիւկմանսն անուանը վերագրելով չումերական ծագում, նշում է, որ գոյութիւն ունի սեմական ծագման երկու արմատ՝ *šr* եւ *štr*, որոնք կարող են աւելնչուել *lštar* անուն հետ. դրանք երկուսն էլ գործածական են եւ ունեն «առատ լինել, լիանալ» եւ «ոռոգել» իմաստները: Նրա կարծիքով, ընդհանուր առմամբ, այդ բոլոր ստուգաբանական ջանքերը մնում են սոսկ ենթադրութիւններ⁵:

Աստղիկ անուան ծագման մասին արտայայտուած տեսակէտները հայագիտութեան մէջ երկփեղկւում են: Անուան ասորական ծագման կամ՝ աւելի ճիշտ, այդ լեզուից պատճէնուած լինելու կողմնակիցները (Հ. Գելցեր, Մ. Աբեդեան, Ա. Մատիկեան, Գ. Ղափանցեան եւ ուրիշ), կարծում են, որ այն ասորական *Kaukabīd* բառի թարգմանութիւնն է, թէեւ նրանց փաստարկները զուտ լեզուական բնոյթի չեն, այլ աւելի՝ առասպելաբանական եւ պատմական. նրանք յենում են Տարօնի չրշակայքը հին ժամանակներում սեմական ցեղերով բնակեցուած լինելու հանգամանքի վրայ:

Ճիշտ է, արամէական ցեղերը դեռ մինչեւ ուրարտական պետու-

³ Т.Гамкрелидзе, В.Иванов, Индоевропейский язык и индоевропейцы, т. II, 1984, с. 685-686, 6861, 875, 8751:

⁴ HENINGER J. Zum Problem der Venussterngöttheit bei den Semiten, *Antropos, International review of Ethnology and linguistics*, v. 71, 1976.

⁵ Տե՛ս Գամկրելիձէ-Իվանովի նշուած աշխատանքը:

գուած է շումերական ինաննայից, որն իր գլխաւոր սրբաւայրում՝ Ուրուկում, յատկապէս պաշտամունքի է արժանացել ցոփ եւ շուայտ կեանք վարող տարփուհիների միջավայրում: Նրան են նուիրուել յատուկ տաճարներ եւ բազմաթիւ սրբատեղեր: Ինաննայի մականուններից են եղել «սիրոյ տիրուհի» եւ «գուարնութեան քագուհի» յորջորջումները, ուր ըստ էութեան գնահատել են նրա պաշտամունքային դերը: Նշուած գծերն աւելի ուշ փոխանցուել են աքադական Իշթարին, նա նոյնպէս ունեցել է բազմաթիւ պաշտամունքային վայրեր, որոնցից Հիմնականներն են եղել Արբելան, Նինուէն, Բիտ-Կիտմուրին եւ Բաբելոնը⁷: Նոյն այդ յատկանիշներն է ցուցաբերում Աստղիկը Հայկական դիցարանում, թէեւ պաշտամունքի հետքերը սակաւ են:

Սեմական ժողովուրդների մէջ Իշթարը յաճախ արական գործառոյթներով է օժտուել: Այդպիսին են նրան ճանաչել արամէացիները եւ հարաւային արաբները⁸: Իսկ ուգարիթեան առասպելներում Իշթարը բնութագրուած է երկսեռութեամբ, որոնցից արականը կրել է Ի'Ariz «փեսացու» մականունը: Նոյն կերպ են վերաբերուել Իշթարին նաեւ Մարիում, որտեղ նա օրհներգներից մէկում բնորոշուած է իր մօրուքաւոր արտաքինով⁹:

Իշթարի արական եւ իգական բնոյթի յատկանիշները լրացնում են մէկը միւսին եւ դժուար է յստակ որոշել դրանցից իւրաքանչիւրի նախնականութեան հարցը ինչը կարօտ է մանրազնին լուսաբանման՝ նոր փաստարկների ներգրամմաբ: Այնուամենայնիւ, կարելի է արժանահաւատ համարել այն, որ շատ վաղ ժամանակներում Իշթարը՝ երբեմն որպէս իգական, երբեմն էլ որպէս արական է ըմբռնուել: Այդ խնդրի կապակցութեամբ գոյութիւն ունեցող տեսակէտները կիսուած են: Ոմանք ընդունում են, որ այն կապուած է երկսեռութեան վաղնջագոյն պատկերացումների հետ, այսինքն՝ նախկինում միաձոյլ (սինկրետիկ) աստծու գոյութիւնն է շեշտուած, միւսները կարծում են, որ ի սկզբանէ արականը եւ իգականը առանձնացուած են եղել, ըստ որում արականն աղերսուել է Լուսաստղի, իսկ իգականը՝ Գիշերավարի հետ եւ շատ աւելի ուշ դրանց նոյնութիւնը հաստատուելով, այդ երկուսը միաձուլուել են մէկ միասնութեան մէջ¹⁰:

7 RINGGREN, *Die Religionen des Alten Orient*, München, 1976, 122.

8 W. EILERS, *Sinn und Herkunft der Planetennamen*, München, 1976, S.56.

9 RINGGREN, *Նշուած աշխատանքը*:

10 HENINGER, *Նշուած աշխատանքը*, 122:

Հայկական Աստղիկը եւս ունեցել է արական դրսեւորում, մասնաւորապէս «Սասնայ ծռեր» ժողովրդական վէպում յանձինս Աստղիկ Պարոնի¹¹ կերպարի: Նա իր սեմական կին զուգահեռի նման վիպական մակարդակում հանդիսացել է հին սեմական արական աստծու՝ Ասթերի հայկական զուգորդը, որը հաւանաբար Սասնայ տան վէպի վրայ սեմական վիպական աւանդութեան ազդեցութիւն կարող է լինել:

Իշթարի արական սկզբի հետ ուղղակիօրէն աւելնչւում է նրա ռազմի բնաւորութիւնը, որին յատկապէս մեծ տեղ է տրուել Ասորեստանում: Նա դիտուել է որպէս թագաւորական բանակները յաղթանակի առաջնորդող աստուածութիւն: Համմուրաբիի օրէնսգրքում նա դիտուել է որպէս իրաւական վէճերի եւ գժտութիւնների հաշտեցնող տիրուհի, յաջողութեան գրաւական: Ի հեճուկս թշնամիների՝ Իշթարը սպառնացել է նրանց՝ պատերազմների սանձազերծմամբ, արիւնահեղութեամբ եւ յեղաշրջումներով: Ասորեստանի տիրակալները անուանել են նրան «վէճերի դատաւոր», «թշնամիներին չիւրնայող» եւ մշտապէս ապաւինել են նրան¹²: Այդ կապակցութեամբ տեղին է յիշել Աստղիկի¹³ հաշտարար դերը Նոյի որդիների՝ Զրուանի (Սեմի), Տիտանի (Քամի) եւ Հապետոսի (Հաբեթի)՝ իր եղբայրների միջեւ գժտութիւնը վերացնելու պարագայում: Զրուանը փորձում է իր որդիներին թագաւոր կարգել բոլորի վրայ, սակայն Տիտանը եւ Հապետոսի են ընդոստանում են եւ դաւ նիւթում նրանց դէմ: Աստղիկը միջամտում է եւ հաշտեցնելով երկու կողմին՝ Զրուանի փրկուած որդիներին մի քանիսին ուղարկում է արեւմուտք՝ Օլիմպոս լեռը¹⁴: Նա ոչ միայն կասեցնում է ահապանքող վէճը, այլեւ տնօրինում է նրանց յետագայ ճակատագիրը:

¹¹ Պարոնը, ինչպէս կը բացատրուի մի այլ տեղում, թերեւս արտացոլում է հ.-ե. Peruna-ին՝ կայծակ-որոտի մի երկսեռ աստուածութեան:

¹² А.Оппенхейм, Древняя Месопотамия, Москва, 1990, с. 162-163.

¹³ Նոյի դստեր, Աստղիկի մասին, որը ծնուել է Զրհեղեղից յետոյ, մենք տեղեկանում ենք միջնադարեան մի շարք աղբիւրներից՝ Յայամաւորբից (Յայամաւուրբ, Կ.Պօլս, 1730, մայիսի 17, էջ 564դ), ՄԻՔԱՅԷԼ ԱՍՈՐՈՒ «Ժամանակագրութիւնից» (Տետոն Միխայէլի Պատրիարքի Ժամանակագրութիւն, յերուկադէմ, 1870): Իշթարը նոյնպէս աւելնչւում է Զրհեղեղի աւանդութեանը: «Գիլգամէշ» դիւցազնավէպում (11-րդ աղիւսակում) նկարագրւում է, թէ ինչպէս եր Իշթարը ողբում, եւ «արցունքները հոսում էին» Զրհեղեղի ժամանակ: Այդ օրուանից Անու աստծու կողմից Ուտնապիշտիմ-Կսիսուտրու-Նոյը եւ իր կինը հաւասարեցւում են աստուածներին ("Эпос о Гильгамеше", М.-Л., 1961, с. 260):

¹⁴ ՄՈՎՍԷՍԻ ԽՈՐԵՆԱՑԻՈՅ Մատեմագրութիւն, Պատմութիւն Հայոց, էջ 16:

Վէճերի տեղիք է տալիս նաեւ Իշթարի ի սկզբանէ աստղային աստղաածութիւն լինելու տեսակէտը: Իշթարի աստղային բնոյթի դիւցուհի լինելու հանգամանքը, թերեւս, առաւել մեծ շեշտադրում է ստանում արամէական ցեղերի (քաղդէացիների) հրապարակ իջնելուց յետոյ: Ինչպէս յայտնի է, քաղդէացիները մեծ աւանդ ունեն աստղաբաշխական եւ հմայական մշակոյթի առաջնութացի հարցում: Իշթարի Վեներայի հետ ունեցած նոյնութիւնը վկայուած է յատկապէս դիւցաբանական բնոյթի բնագրերում եւ առասպելներում:

Իշթարն առնչւում է մահկանացուների ճակատագրի տնօրինման հետ: Շումերական եւ վաղ հին բաբելոնեան թագաւորական արձանագրութիւններից յայտնի է, որ անհատները անմիջական սերտ կապի մէջ են եղել իրենց պահապան ոգիների հետ, ըստ նրանց հաւատալիքային պատկերացումների: Արքունի տան անդամները եւ ինքը թագաւորը նոյնպէս կապուած են եղել դիցարանի աստղածների հետ: Մասնաւորապէս թագաւորի համար Իշթարը եղել է անձնական բարօրութեան երաշխաւորը: Իշթարը հանդիսացել է թագաւորի իշխանութեան հովանաւորը, նրա բախտաւորութեան աղբիւրը եւ առնչւում է հռոմէացիների *fortuna regia* յորջորջմանը¹⁵:

Ըստ երեւոյթին, նոյն այդ յատկանիշներն է ցուցաբերում Աստղիկը հայկական դիցարանում, իսկ արքունի տան այդ կարգի կապուածութեան մասին հանդէպ Աստղիկ դիւցուհին հաղորդում է Հայր Ղ. Ալիշանը, իր «Հիմ հաւատք կամ հեթանոսական կրօնք Հայոց» աշխատութեան մէջ: Հայր Ալիշանի հաւաստմամբ, Արտաշէս Բ-ն իր ընտանիքով շատ էր կապուած աստղածուհու պաշտամունքի հետ, իսկ Աստղիկի հանդէպ նրա տիկնոջ՝ Սաթենիկի սիրոյ մասին ասում է, որ նա չկարողացաւ ազատուել Աստղիկի պաշտամունքից անգամ քրիստոնէութեան ընդունումից յետոյ ու շարունակում էր երկրպագել մեր այս աստղածուհուն եւ զբօսատեղի էր ընտրել Վանից հարաւ ընկած Արտամէտ քաղաքի մօտակայքում տեղադրուած դիւցուհու արձանի ու մեհեանի ստորոտները¹⁶:

Այսպիսով, Աստղիկի եւ Իշթարի կերպարային համապատասխանութիւնները յանգում են հետեւեալին.

15 А.Оппенхейм, Древняя Месопотамия, Москва, 1990, с. 162.

16 Ղ. ԱԼԻՇԱՆ, Հիմ հաւատք կամ հեթանոսական կրօնք Հայոց, Վենետիկ, 1895, էջ 280

- ◆ Աստղիկը եւ Իշթարը սիրոյ աստուածուհիներ են,
- ◆ Երկուսի անուններն ածանցուած են աստղ-star հիմքից եւ նրանց անունն ստուգաբանութիւնների թւում իշխում է սեմականից ծագելու տեսանկիւնը:
- ◆ Նրանք երկուսն էլ աստղային բնոյթ ունեն եւ ներկայացնում են Համապատասխան երկնային լուսատուներ:
- ◆ Դիցուհիները հանդիսացել են իբրեւ վէճերի հաշտեցնող եւ արքունի տան անդամների առանձնայատուկ պաշտամունքի առարկայ:
- ◆ Երկուսն էլ ռազմատենչ են եւ դրսեւորում են երկսեռ յատկանիշներ:

ԵՐԱՆՈՒՀԻ ՄԵԼԻՔ-ՄՈՒՐԱԴԵԱՆ

Comparisons in the Origin of the Names and the Images of the Goddesses Ishtar and Astlik (Summary)

Yeranouhi Melik-Mouradian

The comparative study of the images of the goddesses of love - the Armenian Astlik and the Mesopotamian Ishtar - cumulates in the following conclusion: the goddesses show multiple common points. The names Astlik and Ishtar are derived from the synonyms "astlik" and "star" and studies into interpretations of these names show the prevalence of Semitic origin. Both of them have a stellar nature and are presented as the corresponding celestial luminaries (Morning Star, the Star of Dawn). The goddesses have been shown as reconcilers in quarrels and as members of the royal house worthy of special worship. Both have been shown to have belligerent and bisexual features.